

clarat D. Thomas, quæst. 23, de Veritate, art. 8, ad 2.

8. Atque ex hac conclusione colligitur inutilem esse quæstionem, an liceat homini efficaci actu voluntatis suæ discordare in materiali volito ab efficaci actu voluntatis divinæ: aut enim nota est homini voluntas Dei, aut non; si non est nota, recte potest discordare, sic enim homo sœpe intendit consequi, quod Deus non vult dare, et ratio est, illud tunc consideratur, seu representatur, ut possibile, quia consideratur secundum se, et non ut subest divinæ voluntati, et sub ea ratione potest proponi, ut honestum: sic Abraham statuit occidere filium, et David ædificare templum Dei, quæ tamen Deus nolebat: et in ipsis sanctis Angelis contingit reperiri hujusmodi voluntatis modum, ut colligitur ex Daniele, cap. 10, si autem homini est nota haec voluntas Dei, non potest illi resistere per voluntatem efficacem: ergo non habet locum quæstio de licito, vel illico: addo tamen si per impossibile posset homo habere hujusmodi voluntatem, fore intrinsece malam et illicitem, ut a fortiori patebit ex sequenti assertione.

9. Secunda conclusio.—Dico ergo, supposita prædicta Dei voluntate ex scientia ejus nota, non licet homini simplici affectu desiderare, ut talis Dei voluntas non impleatur, atque in hoc sensu non licet discordare a prædicta voluntate Dei in objecto materiali: hic est sensus posterioris sententiae, et est evidens ex sola terminorum explicatione: nam hic affectus est directe repugnans efficaciam divinæ voluntatis. Unde vel formaliter, vel virtute includit hunc sensum compositum, licet optare ut quod Deus vult efficaciter, non eveniat: hoc autem velle et appetere desiderio etiam simplici est intrinsece malum, quia est directe appetere aliquid repugnans divinæ perfectioni, scilicet vel quod ejus voluntas non sit efficax et omnipotens, vel certe quod mutabilis sit: deinde, quia hic affectus est directe contrarius efficaci voluntati divinæ, quia appetit contradictorium ejus, quod Deus absolute vult, unde invertit totum ordinem divinæ providentia, et illam, quantum in se est, destruit. Neque contra hoc obstat ratio in principio posita, quia hæc divina voluntas intrinsece, et natura sua inducit obligationem non repugnandi illi prædicto modo, et consequenter secum afferit voluntatem Dei præceptivam, saltem præcepto negativo, qua Deus vult obligare hominem ad non repugnandum dicto modo huius divinæ

voluntati, et hic etiam patet, quod paulo ante dicebam, etiamsi per impossibile posset voluntas humana habere voluntatem absolutam contrariam huic divinæ voluntati cognitæ, illam fore intrinsece malam, quia esset destruktiva efficacia divinæ voluntatis, eique directe contraria ex modo tendendi et ex objecto materiali.

10. Tertia conclusio.—Dicendum ultimo. Etiamsi homo sciat Deum aliquid velle efficaciter, potest licite affectu simplici discordare ab hac divina voluntate in materiali objecto secundum se considerato: hic est sensus prioris opinionis, et est omnino certus, ut satis probat exemplum Christi Domini: imo, et ipsius Dei, ut Deus est, qui simul simplici affectu vult salutem ejus, quem alia absoluta voluntate vult dammare. Ratio etiam sœpe tacta est evidens, quia hæc voluntas, ut sic, non est contraria divinæ voluntati: nam potius formaliter, vel virtute includit conditionem, si Deus id vellet, aut si aliunde non repugnet, quam significavit Christus Dominus illis verbis: si fieri potest: et illis, Pater, si vis, unde statim concludit: Non mea voluntas, sed tua fiat: et in superioribus conclusum est simplicem affectum unius objecti, et voluntatem efficacem contrarii objecti non esse repugnatum etiam in eadem voluntate: ergo ex hoc capite hic affectus non est malus, et alioquin potest habere honestam rationem ex parte objecti et finis, ut per se constat: ergo, etc.

11. Sed objici solet illud 1, Regum, 16, ubi Deus reprehendit Samuelem, quia lugebat Saulem quem Deus reprobaverat, Usquequo tuluges Saulem, etc.; etenim ibi Samuel discordabat a prædicto modo tantum a divina voluntate. Respondetur, omissis aliquibus expositionibus, illam non fuisse tam reprehensionem, quam apertiore revelationem divini decreti; Samuel enim nondum intellexerat, an Deus voluntate definita, vel comminatoria tantum Saulem projecisset, et ideo ita Saulem lugebat, et Deum deprecabatur, ut revera impenderet veniam: Deus autem ibi declarat suam voluntatem fuisse absolutam et definitam, et ita monuit Samuelem, ne lugeret Saulem prædicto modo, non tamen prohibuit quominus contrastari posset de malo Saulis secundum se considerato.

12. Sed quæritur ulterius, an non solum possit homo licite hoc modo discordare a divina voluntate, sed etiam teneatur ita dissentiri? Aliqui ita in re sentiunt, ut Abulensis, Josue 2, quæst. 28, et Judic. 3, quæst. 2, et

indicant Bonaventura, Gabriel, et alii. Quæ opinio ad summum intelligenda est de præcepto negativo, quia hi simplices affectus, per se loquendo, non cadunt in præceptum saltem in ordine ad futuros eventus, quia non sunt operativi, intelligi autem potest, ut cadat in præceptum, non habere actum positivum, quo voluntas simplici affectu velit id, quod est malum proximi, et ex hoc capite potest intelligi præceptum non se conformandi tam divina voluntate in objecto materiali. Dico tamen etiam quoad hoc non esse absolutum præceptum, sed considerandum esse motivum talis affectus, nam si quis velit id, quod Deus vult sub ea ratione, vel facta hypothesi, quod Deus id vult, vel propter hunc finem, ut voluntas divina impleatur, nunquam est prohibitus talis affectus, etiam si objectum materiale ejus sit extrema damnatio, quod Deus non vult nisi sub ratione justitiae punitivæ ex præscientia peccati finalis: si autem motivum fuerit honestum, tunc affectus erit malus, non propter conformitatem cum divina voluntate, sed aliunde, quod est per accidens.

13. Atque idem respondendum est ad aliam interrogationem quæ fieri solet, esto non sit necessarium, an sit melius conformari hoc modo per actum simplicem cum divina voluntate. Respondetur posse esse melius interdum, interdum vero non juxta diversa motiva, seu fines, qui occurrere possunt, nam quando nulla occurrit specialis ratio honesti, quæ moveat voluntatem ad hujusmodi simplicem affectum materialiter diversum a divino decreto, melius erit non habere illum. Item si homo intelligat ex hujusmodi affectu fore retardandum ab executione divinæ voluntatis, interdum vero non sequitur hoc incommodum, et occurrit honestissimum motivum ad habendum illum affectum, et tunc erit melius habere illum sicut fuit in Christo Domino, et in Beata Virgine, quando dolebat de Christi morte, quam Deum decrevisse sciebat.

## DISPUTATIO XII.

## DE PROXIMA REGULA BONITATIS ET MALITIÆ HUMANORUM ACTUM QUÆ EST RECTA RATIO, SEU CONSCIENTIA.

Si doctrina hæc de conscientia ad singulas res morales applicanda esset, in immensum cresceret: sed hoc non potest exacte fieri, nec sine magna confusione, quia oportet fere omnes materias moralis theologiae evolvere,



## SECTIO I.

## Quid sit Conscientia.

1. Prima sententia.—Prima opinio est esse aliquid ad voluntatem pertinens, scilicet aut bonam inclinationem voluntatis, aut operationem voluntatis, huic inclinationi conformem, vel difformem. Ita Henricus, quodlibet 4, quæst. 18, quem ex parte sequitur Durandus, in 1, distinct. 39, quæst. quarta. Fundari potest in locutionibus communibus, et proprietatibus, quæ conscientiae tribuuntur, dicitur enim conscientia mundari, ad Hebreos 11, quod est proprium voluntatis, quæ per peccatum maculatur. Dicitur conscientia bona, 1, ad Timoth., 4, et inquieta, ad Tit., 5: Inquietæ sunt eorum mens et conscientia, ubi etiam a mente distinguuntur, et communiter ita loquimur habere hominem bonam, vel malam conscientiam, quæ sunt proprietates proprieatis voluntatis.

2. Secunda sententia.—Secunda opinio, et communior theologorum, ponit illum in intellectu, et in hoc est magna varietas, nam Scotus, in 2, d. 39, dicit esse habitum, vel synderesis, vel scientia, vel prudentia; D. Thomas vero 1 p., q. 79, art. 13, dicit esse actum: existimo tamen totam questionem esse positam in æquivocatione vocis: ut vero sciamus, in qua significatione in hac materia loquendum est.

3. Prima assertio.—Dicendum primo conscientiae nomen juxta frequentiorem usum significare aliquid pertinens ad intellectum. Ita Scholastici statim citandi, et Patres, quos D. Thomas supra refert, Basilius, in principio Proverbiorum, vocat conscientiam naturale judicatorium animæ, Damascenus, 2 libro, cap. 12, vocat legem intellectus nostri, Hieronymus, Ezech., 1, vocat synderesim scintillam conscientiae: synderesis autem ad intellectum spectat, Origenes, libro secundo, ad Bonaventuram, conscientiam vocat spiritum correctorem, et paedagogum animæ, similiaque reperies in aliis, præsertim in Hugone et Bernardo: colligi etiam potest ex illo ad Romanos 14: Quod non est ex fide peccatum est, ubi nomine fidei conscientia significatur, ut Ambrosius et alii communiter exponunt, et significat Innocentius III, in cap. ult., de Prescriptionibus,

et Gratianus, late, 28, quæst. 4, cap. *Omnis*, § *Ex his*, et de Pœnitentia, dist. 3, cap. *Quærit*, § *Illud autem*. Denique probari potest ex communi modo loquendi Scripturæ, et ex effectibus qui conscientiæ tribuuntur, Eccl. 7, scit enim conscientia tua, et Genes., 43: *Non est in nostra conscientia quid posuerit*; id est, nescimus. Paulus, ad Romanos 2: *Testimonium illis reddente conscientia ipsorum*, testificari enim est potentiae intelligentis, non vero voluntatis, quæ cæca est, et cap. 9, *Testimonium mihi præbente conscientia mea*: 1 ad Corinthios, cap. 12, alibi dicitur conscientia accusare, dirigere, et similia, quæ ad intellectum sine dubio spectant.

4. *Secunda assertio*. — Dicendum secundo conscientiæ nomen equivocum esse, et interdum habitum, et interdum actum intellectus significare: frequentius tamen, et magis proprie actum significare. Tota conclusio sumitur ex D. Thoma, supra, 1 part., et in 2, dist. 24, quæst. 2, art. 4, ubi praeter habitum et actum dicit interdum significare objectum, quomodo dicimus aperire conscientiam in confessione, id est, id quod conscientiam in homine accusabat, sic etiam dicitur bona, vel mala objective, addit etiam idem D. Thomas, quæst. 17, de Veritate, art. 1, interdum etiam significare intellectum ipsum, licet magis improprie, quomodo intelligi potest, id quod dicitur lumen conscientiæ non extingui, quia licet non semper sit in actu, vel habitu, semper tamen manet lumen rationis, quod suis temporibus urget. Idem D. Thomas, in 2, dist. 39, q. 3, art. 1, Bonaventura, art. 1, q. 1, Richardus, art. 2, q. 1 et 2, Gabriel, art. 2, concl. 5 et 6, Durandus, q. 4, Capreolus, q. 4, Alensis, 2 p., q. 77, et quæst. 137, membro 3 et 4. Neque oportet aliud addere, præter usum sapientum, sive patet ultima pars conclusionis, quæ etiam probatur ex effectibus enumeratis, nam testificari proprie fit per actum intellectus, et multo magis obligare, quia habitus non obligat, nisi ausi actuale dictamen, similiter non accusat, nec mordet, nisi actualis cognitio: hinc etiam dicitur intrinsece malum agere contra conscientiam, quod non est verum de habitu, et multo minus de potentia. Tandem dicitur deponi conscientiam ratione actus; licet nec potentia, nec habitus deponatur: est ergo hæc propriissima significatio, et maxime deserviens præsentis instituto.

5. *Tertia assertio*. — Dicendum tertio conscientiam esse actuale et practicum judicium intellectus discernentis de rebus agendis inter-

bonum et malum, turpe et honestum, præcep-  
tum, vel prohibitum. Hæc conclusio colligitur ex auctoribus citatis et aliis, quos referunt et sequuntur Corduba, libro tertio Questionum, quæstione prima, Covarruvias, in Regula pos-  
sessor., parte secunda, § 6, in principio, et im-  
primis, quod conscientia sit actus judicii. Pa-  
tet, quia est quædam fides, seu credulitas, ut  
ex Paulo retulimus. Item, quia conscientia est  
vera, aut falsa, ut postea dicemus, quæ sunt  
proprie in judicio intellectus. Denique ex ef-  
fectibus positis testificandi et accusandi, quæ  
non fiunt in homine, nisi quatenus illi mani-  
festatur, quid sit honestum, vel turpe: mani-  
festatio autem fit per judicium.

6. Et hinc etiam constat altera pars, scilicet hoc judicium debere esse de agendis secundum rationem turpis et honesti, quia hac ratione obligat, vel accusat, etc. Quando vero dici-  
mus debere esse judicium practicum, adver-  
tendum est interdum hoc judicium posse ver-  
sari proxime circa actionem ipsam humanam,  
ut hic et nunc pensatis omnibus existimatam  
honestam, vel turpem, et hoc est proprie con-  
scientiæ judicium, quod practicum dicitur, quia  
judicat de actione in particulari cum omnibus  
circumstantiis ejus in ordine ad executionem:  
interdum vero potest esse judicium de aliqua  
conditione, vel principio, ex quo pendet ho-  
nestas, vel turpitudo actionis, ut est utrum  
hæc res sit mea, vel aliena, ex quo pendet, an  
actio sit justa, vel injusta, et hoc solet appellari  
judicium conscientiæ, quomodo dicitur  
aliquis possidere rem alienam bona vel mala  
fide, seu conscientia, et hoc judicium formaliter  
magis est speculativum, quam practicum,  
et interdum sufficit, ut actio mala moraliter  
censeatur, ideo nomen conscientiæ retinet.

7. Atque hinc solvitur objectio Durandi, pro-  
bat enim non posse conscientiam consistere in  
hoc actuali judicio practico, quia alias non  
posset homo agere contra conscientiam, quia  
non posset agere contra actuale iudicium. Res-

pondetur enim hinc potius probari oppositum,  
nam proprie non dicit homo agere contra con-  
scientiam, nisi quando actu judicat se male  
agere: unde si interdum male agit sine tali  
judicio, non dicitur proprie agere contra con-  
scientiam, quam habet, sed quam potest et  
debet habere: nego igitur non posse hominem  
agere contra actuale judicium et practicum.  
Sed ut hoc intelligatur observandum est, aliud  
esse judicare de agendis, et de obligatione,  
seu honestate eorum ex propriis principiis ip-  
sius rei, vel actionis: aliud vero ex vi prioris

affectus, et determinatione voluntatis, ut quan-  
do supposita intentione unius finis judico, hoc  
consequenter esse faciendum, et utrumque ju-  
dicium potest etiam aliquid speculationis in-  
cludere, quatenus aliquam veritatem manifes-  
tat, et utrumque etiam est practicum quatenus  
est de re agenda in particulari, et in ordine ad  
executionem: tamen primum est proprium  
judicium conscientiæ, quod per se discernit  
honestum a turpi, et illud nullam necessitatem  
imponit voluntati, quia nec per se potest, ne-  
que supponit ejusdem voluntatis actum, in  
eius virtute id faciat, et ideo recte potest vol-  
luntas pro sua libertate resistere conscientia;  
secundum autem judicium solet imponere ne-  
cessitatem non absolute, sed ex suppositione  
prioris voluntatis, si illa non mutetur, tamen  
illud non est proprie judicium conscientiæ,  
quia non tam est de honestate, vel turpitudine  
actionis, quam de utilitate, seu connexione  
cum priori affectu: legatur D. Thomas, q. 47,  
de Veritate, art. 1, ad 4.

8. *Ad quem habitum spectet conscientia*. —  
Quæri potest, si conscientia est actus judicii,  
quem habitum generet, vel ad quem habitum  
spectet. Respondetur ex D. Thoma, locis cita-  
tis, conscientiam in tota sua latitudine non  
pertinere ad unum habitum, sed ad varios pro  
varietate sua, nam si judicium conscientiæ sit  
certum et verum, et sit de actione, ut practice  
exercenda, pertinet ad prudentiam: si vero sit  
de actione in communi, vel de principiis ejus,  
pertinet ad synderesim, vel sapientiam mora-  
lem; si vero sit de conditionibus rei, potest  
pertinere ad fidem humanam, vel experien-  
tiæ, at vero si conscientia sit erronea, ut sic  
pertinet ad aliquam opinionem, vel falsam fi-  
dem humanam.

## SECTIO II.

*Quotuplex sit conscientia*.

1. *Prima divisio conscientia*. — *Conscientia præteriorum*. — Ex parte objecti materialis sumitur prima divisio in hunc modum. Nam interdum conscientia dicitur præteriorum, interdum præsentium, interdum vero futu-  
rum actum. Priori modo loquimur communiter de conscientia cum dicimus conscientiam examinare et habere, vel non habere con-  
scientiam peccati, juxta illud: *Hæc est gloria nostra, testimonium conscientiae nostre*: sic enim proprie dicitur conscientia mundari, seu liberari a peccato, quomodo aiebat Paulus:

2. *Seconda divisio in conscientiam veram, vel falsam*. — *Veritas practica quod conscientiam spectat, qualis esse debet*. — Secunda divisio principalis est in conscientiam veram et falsam, seu erroneam: cum autem conscientia erronea sit ignorantia quædam prævæ disposi-  
tionis, ad illam applicari possunt omnes divi-  
siones supra traditæ, quæstione sexta: potest enim esse vincibilis, vel invincibilis, etc. Quan-  
do autem dicimus conscientiam esse judicium practicum, non est facile ad explicandum quid ad illius veritatem requiratur, nam Aristote-

sunt ræche multiplicatae

les 6, Ethic., cap. 2, quem ubique imitatur D. Thomas 1, 2, quæst. 49, art. 3, ad 2, et quæst. 57, art. 5, ad 3, 4, contra Gentes, c. 62 et 67, distinguit inter veritatem speculativam et practicam, et priorem dicit sumi ex conformitate ad rem, posteriorem vero ex conformitate ad appetitum rectum, de qua conformitate magna est controversia inter doctores, ut videre licet in Cajetano, dicta quæst. 57, a. 5, ad 3, et Durando, in 3, dist. 36, et latissime Corduba, lib. 2, quæst. 8, 9 et sequentibus, nam Cajetanus et alii dicunt esse intelligentiam de conformitate ad appetitum rectum antecedentem, quibus favebat D. Thomas expōnens Aristotelis dictum de judicio practico, quod versatur circa media ex intentione finis; nam tunc est practice verum, quando est conforme intentioni rectae. Scotus vero illud intelligit de appetitu recto subsequente, seu judicato per tale judicium, et intelligit tunc judicium esse practice verum, quando actus appetitus, qui judicatur honestus revera hic et nunc est honestus respectu operantis, quamvis fortasse secundum se non sit talis, qualis judicatur: unde fit etiam ut Scotus ponat hanc veritatem practicam in cognitione, ut sic; Cajetanus vero negat posse esse veritatem practicam sine recto appetitu, vel antecedenti, vel etiam consequenti, si illum exigat veritas judicii practici.

3. Sed quanquam loquendo stricte de imperio prudentiae, ut sic, possit inter has opiniones esse controversia, quæ ad præsentem locum non spectat, tamen, proprie loquendo de judicio conscientiae, mihi videtur doctrina Scotti clarior et verior, et utilior, quia judicium conscientiae non tantum de actu circa media, sed etiam de actu circa finem, quia uterque actus potest esse bonus et malus: unde uterque indiget regula judicii intellectus, quæ est per judicium practicum; unde uterque potest esse conformis, vel contrarius conscientiae. Ex quo tandem concluditur conscientiam, ut sic, non posse dicere habitudinem ad appetitum rectum antecedentem, quia ille appetitus rectus necesse est, ut supponat judicium conscientiae, in quo sistendum est tanquam in priori, quandoquidem intellectus prior est voluntate, et in illo quidem primo judicio conscientiae potest esse veritas, et falsitas practica, quæ non potest sumi per conformitatem ad appetitum rectum antecedentem: ergo per conformitatem ad appetitum, qui est objectum talis judicii.

4. Dices, teste Aristotele, eodem 6, Ethic.,

cap. 4: Appetitus est rectus quatenus sequitur rationem rectam; ergo si e contrario ratio est vera per ordinem ad eumdem appetitum subsequentem, erit circulus. Respondetur non esse circulum, quia interveniunt diversa genera causarum, nam conscientia est recta conformitate ad appetitum, ut objectum, et rem judicatam: e contrario vero appetitus est rectus ex conformitate ad rationem, ut applicantem debitum objectum appetibile, et alii fortasse dicent, ut ad effective moventem. Sed urgebis: nam hinc nulla videtur esse differentia inter veritatem speculativam et practicam, quia etiam veritas practica sumitur ex conformitate ad rem judicatam, et ad summum erit differentia materialis, quia hic res judicata est actus voluntatis; in alia autem veritate speculativa potest esse quæcumque res. Respondetur revera in hoc esse aliquam similitudinem, quæ est omnino necessaria: quia utraque veritas, est veritas judicii et cognitionis: unde utraque esse debet commensurata objecto suo: solum est advertendum, quod veritas speculativa non causat objectum, neque efficit, ut sit ipsi conforme: judicium vero practice verum, si revera tale est, efficit, ut appetitus, qui ex illo nascitur sit rectus, quantum est ex parte ipsius judicii, et quia sufficienter applicat objectum, quod voluntas prosequendo recte tendit, et ideo hæc veritas practica non solum est cognoscitiva, sed etiam causativa, atque ita quotiescumque appetitus, qui sequitur, honestus est, conscientia per quam regulatur vera est, et e contrario quandocumque conscientia est vera practice, appetitus, qui ex illa sequitur, rectus erit, et hoc modo recte dicitur veritas practica conscientiae sumi ex conformitate ad appetitum rectum, e contrario falsitas practica sumitur ex diffinitate ad eumdem appetitum.

5. *Conscientia dupliciter dici potest, vera et falsa.* — *Conscientia practice vera quomodo possit esse speculative falsa.* — Atque hinc constat dupliciter posse esse conscientiam veram, aut falsam, speculative et practice, interdum enim vel utroque modo vera est, vel utroque modo falsa: scilicet quando, et rei ipsi secundum se, et secundum intrinsecam ejus principia, et in particulari, ut hic et nunc, comparatur an operantem, conformis est, vel diffinis: aliquando vero est vera practice, et falsa speculative, quo modo conscientia, quæ vocatur erronea invincibiliter falsa est, quatenus erronea est: est autem practice vera, quia, ut supra dictum est, appetitus, qui ex illa sequi-

tur, revera rectus est, unde ejus veritas est omnia illa membra posse dupli ratione ita practica, quia sumitur in ordine ad appetitum operantis cum his circumstantiis, et cum illo habet veram conformitatem. Dices, quomodo potest idem judicium simul esse verum et falsum. Respondetur primo, quia hæc ad modum relativi dicuntur respectu diversorum, sicut simile et dissimile. Secundo, quia si res attente consideretur, tale judicium conscientiae, quod est practicum, de actione sic operantis est simpliciter verum, falsum autem, vel erroneum videtur denominari, aut solum per denominationem extrinsecam et concomitantiam, quia fundatur aliquo modo in aliquo errore circa aliquam conditionem, ex qua pendet honestas talis actus, quia judicium, ut diximus, solet interdum applicare conscientiam, vel dicitur certe illud judicium erroneum, seu falsum comparatum non ad objectum circa quod hic et nunc versatur, sed ut comparatur ad objectum secundum se sumpsum, prout natura ejus exigebat, ut quando Jacob judicavit licitum sibi esse petere debitum a Liæ, illud judicium erat verum practice, id est, comparatum ad objectum ut hic et nunc sic propositum, tamen comparatum ad personam Liæ secundum se, et secundum conditionem, quam in re ipsa habebat, erat falsum, quia vere non erat propria uxori; unde ad eumdem modum fieri e contrario potest, ut judicium sit practice falsum, et speculative verum, ut si in eodem casu Jacob judicasset non fuisse redditum debitum Liæ, practice enim falsum esset, licet considerata re secundum se esset verum.

6. *Tertia divisio conscientiae.* — Tertio dividitur conscientia in certam, dubiam, probabilem et scrupulosam, cum enim conscientia sit actus cognitionis et judicii proprii, et per se, dividitur per proprietates cognitionis, unde sicut ex ordine ad materiale objectum dividitur per veram et falsam, ita ex ordine ad formale, seu ad medium judicandi dividitur per certam, dubiam, probabilem et scrupulosam. Petes, quomodo possint esse plura membra hujus divisionis, omne enim medium essentiendi solum est aut certum, aut probabile; unde nulla videtur esse conscientia dubia distincta a probabili; nam vel includit judicium cum formidine, et ita coincidit cum probabili, vel nullum includit judicium, sed consistit in negatione, vel impotentia assentiendi, et ita non est conscientia. Aliunde vero videtur ibi deesse aliud membrum conscientiae temerariae: ut explicetur hæc divisio, advertendum est fere